

甌

北

詩

話

甌北詩話卷七

陽湖 趙翼 雲松

陸放翁年譜小引

放翁集向無年譜然身閱六朝歷官中外仕而已已而仕出處之迹既屢更且所值之時當宋南渡戰與和局亦數變使非有譜以標歲月則讀者於先生之身與世將茫無端緒幸先生詩自入蜀以後四十卷係手自編訂四十卷之後至八十五卷則其子虞當先生在時卽隨年記錄故歲序差可考而文集中碑記之類亦多書明年月官位可以稽其時地昔王宗稷作蘇文忠年譜悉本東坡大全集詮次之今余亦彷彿此例就劍南詩

集渭南文集及家世舊聞老學庵筆記等書次其先後  
蓋已十得八九惟入蜀以前少年之作所存無幾難於  
懸揣然事迹亦往往散見於詩文因亦就其可知者繫  
於某年之下并畧載時事以相印証庶讀者可以一覽  
瞭如云

陸放翁年譜

宋徽宗宣和七年

乙巳

先生生於是年十月十七日在淮上舟中是日平旦

大風雨及先生生而雨止

見先生慶元元年詩題又有詩云少  
傳秦紹朝京師嚴舟生我淮之湄

按先生先世自嘉興徙錢塘吳越時又徙山陰之魯  
墟世業農宋祥符中陸軫始以進士起家仕至吏部

郎中直昭文館贈太傅是爲先生高祖軫生珪官國

子博士贈太尉是爲先生曾祖珪生仰仕至尚書左

丞贈太師楚國公是爲先生之祖炎佃生宰字元鈞

則先生父也

見先生文集及家世舊聞

其官位不可考按先生跋向

薌林帖云先少師使淮南實與薌林爲代跋周侍郎

奏稿云余生於宣和末年先少師以畿輔轉輸餉軍

澤潞寓家於滎陽又云先君以御史徐秉哲論罷南

來壽州則先生父蓋嘗官提舉轉運等職跋楚公奏

稿云此先少師紹興中命筆吏傳錄者又作陳彥聲

墓誌云建炎四年先君會稽公奉祠洞霄宮則南渡

後曾有祠祿又跋朝制要覽及持老語錄皆云先君

會稽公則其官階及勲封可見也惟文集稱先少師詩集稱先少傅微有不同然師傳同一階蓋皆應得之封耳

欽宗靖康元年

丙午

二年

丁未

二帝北行

高宗建炎元年

卽靖康二年五月卽位改元

二年

戊申

三年

己酉

金兵南下帝航海

四年

庚戌

帝歸臨安金立劉豫爲子皇帝

先生年七歲按陳彥聲墓誌云建炎四年金兵南來先君欲避無所聞東陽陳彥聲以俠稱乃挈家依之

居三年乃歸跋周侍郎奏稿云先君自徐秉哲論罷  
後南來壽春又自淮徂江間關兵間及歸山陰舊廬  
則某年已稍長矣開禧中有詩追記云家本徙壽春  
遭亂建炎初南來避狂寇乃復遇强胡亂定不敢歸  
三載東陽居蓋先生生而遭亂其父挈之避兵由壽  
州過江又僑居東陽者三年至紹興二三年始歸山  
陰

紹興元年

辛亥

二年

壬子

三年

癸丑

四年

甲寅

先生年十歲按跋周侍郎奏稿云先君歸山陰一時  
賢公卿與先君遊者言及靖康北狩無不流涕哀慟  
又跋傅給事帖云紹興中某甫成童見當時士大夫  
言及國事無不痛哭人人思殺賊蓋皆此數年中事  
先生生平以復讐爲念蓋自幼習聞先正之言至老  
不變也又嘉泰元年有詩謂某十許歲卽往來雲門  
諸山

五年

乙卯

金太宗崩熙宗立

徽宗殂於金

六年

丙辰

先生年十二能詩文以蔭補登仕郎本傳按先生父南  
渡後不見有仕宦之迹蓋以祠祿致仕所得恩蔭也

七年<sub>丁巳</sub> 金廢劉豫

先生年十三跋陶淵明集云吾年十三四時侍先少

傅居城南小隱

八年

<sub>戊午</sub>

相秦檜

<sub>先已罷相至是再相</sub>

與金議和

九年

<sub>己未</sub>

金人歸河南陝西地

十年

<sub>庚申</sub>

金復取河南陝西

先生年十六初赴舉場按先生燈籠詩云我年十六

遊名場靈芝借榻棲僧廊又跋范元卿書後云紹興

庚申辛酉間予年十六七與陳公實及子從兄伯山

仲高葉晦叔范元卿皆同場屋

十一年

<sub>辛酉</sub>

和議成



先生年十七尚從師受業與許子威輩同從鮑季和

先生晨興必具袍帶而出

見嘉泰元年詩自註

十二年

壬戌

金人歸徽宗鄭后邢后之喪及韋太后

十三年

癸亥

先生年十九以舉進士試南省至臨安

見嘉泰三年詩自註

十四年

甲子

先生年二十作司馬溫公布被銘

自註年二十歲所作今傳以為秦少游作者非也

又作菊枕詩

見丁未歲詩註

是年上元在都城從舅光州通判

唐仲俊觀燈

見嘉泰二年詩自註

十五年

乙丑

十六年

丙寅

十七年 丁卯

先生年二十三按先生跋韓非子云紹興丁卯先君

年六十時所得吳棫才老本

先生是年父尚在而後未見存丁父艱之事蓋其父歿於此數年中

十八年 戊辰

十九年 己巳

金完顏亮弑熙宗而自立

二十年 庚午

二十一年 辛未

二十二年 壬申

二十三年 癸酉

金遷都於燕

先生年二十九兩浙轉運使陳阜卿為考試官秦檜

孫墳以右文修撰就試直欲首送阜卿得先生文擢

置第一墳次之棺大怒

十四年

甲戌

先生年三十試禮部被黜時陳阜卿亦幾得禍

十五年

乙亥

秦檜死

十六年

丙子

欽宗殂於金

十七年

丁丑

先生年三十三作雲門壽聖院記尚無官位但書吳

郡陸某記

二十八年

戊寅

先生年三十四官福建寧德縣主簿

先生有胡內翰啟云仕由資蔭蓋先生十二歲

所得恩蔭至是始選主簿也

是歲作寧德縣城隍記紫衙書進功郎主

簿曼按先生赴任由溫州入闕有題江心寺泛瑞安

江及平陽驛觀梅等詩

二十九年

己卯

先生年三十五在寧德按先生跋盤澗圖云紹興己卯庚辰之間予爲福州決曹掾與閩縣大夫張仲欽甚相得

三十年

庚辰

先生年三十六以薦者除敕令所刪定官遷大理司直兼宗正簿本傳盤澗圖跋云紹興己卯庚辰予爲福州決曹是是年春間尚在寧德也祭周益公文云紹興庚辰予始至行在與益公相遇遂定交則以除敕

令所入都也先生自閩歸途亦從溫處經行有詩記其事云自來福州詩酒殆廢今北歸至永嘉括蒼無日不醉又有詩記紹興庚辰遊謝康樂石門王仲信爲作石門瀑布圖皆自閩歸杭之遊跡也

三十一年

辛巳

金主亮南侵被弑於爪洲金世宗立入

都於燕

先生年三十七在敕令所遷樞密院編修官按本傳謂孝宗卽位遷樞密院編修官而先生子子虞跋語云紹興辛巳及事高宗累遷樞密使編修是樞院乃高宗所授先生晚汪茂南詩云往者紹興末江淮聞戰聲自註先相公

汪

督師荆襄招予幕府會所樞屬

不克行又跋陳魯公所草親征詔云辛巳壬午之間予爲西府掾西府卽樞院也是樞院之遷在紹興無疑又史館書事詩云紹興辛巳嘗蒙恩賜對先生奏楊存中不宜掌禁旅非宗室外家不宜封王皆在是年又上執政書論文章關於道術

見文集

二十二年

壬午

高宗傳位於孝宗

先生年三十八自敕令所罷歸孝宗卽位

集

以史浩

黃祖舜薦召見賜進士出身擢太上皇帝聖政所檢

討官

本傳

按先生跋曾文清奏稿云紹興末文清居會

稽予自敕局罷歸無三日不見又作復齋記亦稱是

年自都下還里蓋是春夏間事其因薦召用雖不載

月日然是年十一月上疏請信詔令治其尤阻格者  
計已在檢討任可知皆孝宗初卽位未改元之歲也  
又丙午歲晚書懷詩自註紹興末予官玉牒所蓋因  
修聖政記故兼是官有玉牒所迎駕詩

孝宗隆興元年

癸未

先生年三十九在檢討任正月二十一日二府請先  
生撰致夏國主書二月二日又請作省劄招諭中原  
士民集金蒙城邢珪侵邊殺我義民旣而被擒朝議  
將置大辟先生上書謂彼能爲其國盡力宜免誅以  
示中國禮義閬州奏慶雲見先生上書率執勿受其  
圖和議將成又上書二府當與金人約建康臨安皆

建都地俱見按先生復齋記又謂隆興元年某自都還

里始與仲高遇又王彥光見訪并送茶詩云邇英帷  
幄舊儒臣肯顧荒山野水濱遙想解醒須底物隆興  
第一壑源春則是年似又曾歸里按先生方任檢討  
何以又返山陰豈乞假暫歸耶

二年甲申

先生年四十時曾覲龍大淵用事先生爲樞密張燾  
言燾遽以聞上詰語所自來以先生對上怒出先生  
通判建康尋易隆興府本傳按本傳先通判建康今集

中竝無建康詩豈不久卽調京口耶先生跋張敬夫  
書謂甲申佐郡京口張忠獻浚以督軍過焉故常與



其子敬夫遊按浚歿於是年八月則先生通判京口  
必在春夏矣又序京口倡和詩謂隆興二年閏十一  
月韓死咎來省親於潤予時通判郡事故與倡和云

乾道元年

乙酉

先生年四十一在鎮江有鎮江府城隍忠祐廟碑記

二年

丙戌

先生年四十二自鎮江移官通判豫章

即本傳所云隆興府上陳安撫啟云

佐州北固麥市及於再嘗  
易地南昌爪末期而先代

七月舟行星子縣半日至吳城

見詩集

本傳謂言者論先生交結黨人力說張浚用兵遂免

歸

先生在蜀有詩云少年論兵實任  
安諫官劾奏當京師正指此事也

先生幽棲詩自註乾道丙

戌始卜居鏡湖之三山而慶元三年春盡遣懷詩自

註則云予以乾道乙酉卜築湖上蓋乙酉買宅丙戌  
罷宮歸始入居之嘉泰甲子有詩云曩得京口俸始  
卜湖邊居乙酉正在京口以京口俸買宅正是年也  
入居則丙戌耳

開東園之路詩云憶自南昌返故鄉移  
家來就鏡湖涼是自南昌歸始居之証

三年

丁亥

先生年四十三正月十四日作崇恩禪院記繫銜但  
書通直郎而無職任已罷官故也

四年

戊子

五年

己丑

先生年四十五是年十二月差通判夔州

見入蜀記

六年

庚寅

先生年四十六以閏五月起行十月二十七日到夔

州

將赴夔府書懷云自從南昌免五歲嗟不調蓋自丙戌至庚寅凡五閏歲矣

七年

辛卯

先生年四十七春間監夔州試有試院呈同舍詩有  
出院及拆號前一日作等詩作王侍郎生祠記繫  
國書左奉議郎通判軍州主管學事兼管內勸農事

八年

壬辰

先生年四十八以夔州通判將滿任上書虞丞相預  
乞一官得就祿是會王炎宣撫川陝辟爲幹辦公事  
本傳按先生是年作靜鎮堂記繫銜書左承議郎權四  
川宣撫使幹辦公事兼檢法官蓋已作幕僚去夔州

任矣送范西叔序云乾道壬辰予至益昌始識范東叔後月餘與其兄西叔爲僚於宣威幕府是年北遊南山望鄠萬年縣皆以幕僚出使

見靜鎮堂記及東樓集序

九年

癸巳

先生年四十九自成都唐安至漢嘉四十日復還成都尋攝蜀州有初到蜀州寄成都諸友詩入夏又攝嘉州

先生跋岑嘉州集云乾道癸巳予自唐安別駕來攝嘉州

八月作漢嘉郡藏丹洞記

官舍多奇石取作假山名西齋曰小山堂

見詩集

淳熙元年

甲午

先生年五十秋間攝蜀州事有蜀州大閱詩按是年秋夜讀書詩云別駕生涯似蠹魚又與呂周輔教授

遊大邑諸山云廣文別乘官俱冷蓋皆以通判攝州

事也冬又往榮州攝事

蓋幕僚係辟用而本品仍是通判

二年

乙未

先生年五十一在榮州得制置司檄催赴叅議官任  
正月十日離榮州有詩范成大來帥蜀又辟爲叅議  
官以文字交不拘禮法人訕其類放因自號放翁

本傳

三年

丙申

先生年五十二作范待制集序及籌邊樓記繫銜書  
朝奉郎成都府路安撫司叅議官兼四川制置使司  
叅議官是年有假保福院詩云飽飯卽知吾事了免  
官初覺此身閒又聞中偶題詩七千里外新開客十

五年前舊史官病中戲書云免從官乞假且喜是閒身又有蒙恩奉祠桐柏詩云罪大初聞收郡印恩寬俄許領家山蓋緣事不復攝州別領桐柏祠祿

四年

丁酉

先生年五十三由桐柏祠祿換授主管台州崇道觀

見銅壺閣記及彭州貢院記

是歲范成大還朝先生有詩送行秋間得

都下八月報書收敘州有詩然以後無敘州詩但有

東歸有日書懷詩及遣興詩自註予將赴夔道被命

東歸蓋吏部選敘州而朝旨令赴行在也

後有上書乞祠詩述此云聖君

終省記萬里忽乘驛

五年

戊戌

先生年五十四離蜀東歸有賞海棠詩云吉日不聞  
春已老歸舟已具客將行又明年憶蜀中詩云去年

忝號召五月觸瞿塘蓋以春暮出蜀仲夏過峽也子

虞跋語謂戊戌春孝宗念其久外趣召東下

蓋是去年  
選敘州之

後又先生乞祠詩遠客遊窮塞亭障秋蕭瑟聖君終

省記萬里忽乘驛是東歸實出於內召先生有謝王

樞密啟云斐然妄作本以自娛流傳偶至於中都鑒

賞遂塵於乙覽蓋先生在蜀有詩傳入都孝宗聞之

故特召還也謝錢參政啟云一麾在巴蜀之間萬里

促宣溫之對清光咫尺膺賞再三略有司資格之常

備奉使詢謀之選方憂官滿又辱詔追半道遣行雖

嘆棲遲之薄命頻年省記要爲比數於諸公據此則  
召還後曾賜對便殿卽膺出使之命未幾有詔別用  
尋遣往閩中

按先生此次入閩官階無考子寅跋語云先君九五佐郡則此乃通判建安也

以詩集考之

秋間便道歸里作一月留

見明年己亥在建安憶家詩

歸雲門詩云徵

官行矣閩山去又寄千巖夢想中此行從衢州入閩

有仙霞嶺漁梁驛諸詩其官舍在建安

見詩集

六年

己亥

先生年五十五春夏在建安多不得意屢見於詩仲  
夏先發書畫還故山有詩尋去官有初發建安詩云  
吾行迫及晚秋時歸途由武夷山過信州鉛山縣至  
衢州奏乞祠畱衢待命除提舉江南西道常平茶鹽



公事賜緋魚袋卽在衢起行十二月至江西有弋陽

縣饒撫道中等詩治在撫州

見撫州廣壽禪院記

是冬奏筠州反

坐百姓陳彥通訴人吏冒役狀

見文集

七年

庚子

先生年五十六秋冬自臨川至高安十一月被命詣

行在

見廣壽禪院記

按本傳以發粟賑民爲給事中趙汝愚所

駁遂與祠過嚴州得請免入奏仍除外官遂使道歸

山陰

見

是年在臨川時自作放翁贊

見

以後皆家居

八年

辛丑

先生年五十七自庚寅至辛丑始見九日於故山

見詩集

是年有寄朱元晦提舉詩以年荒望其來賑糴也

九年

壬子

先生年五十八築堂曰書巢自作記又追作成都古  
楠記自註時已去蜀其繫銜書朝奉大夫主管成都  
府玉局觀有詩云放翁自髮已蕭然黃紙新除玉局  
仙

十年

癸卯

先生年五十九有寄題朱元晦武夷精舍詩

十一年

甲辰

先生年六十有聞虜酋遁歸漠北詩按是歲金世宗  
如會寧命太子守國明年始回燕京曰遁歸者傳聞  
之訛也

十二年<sub>乙巳</sub>

先生年六十一是歲有秋懷詩自註聞虜酋行帳爲壯士所攻幾不免又感秋詩自註聞虜酋自香草泥入秋山蓋遠遁矣按金世宗最爲君國中稱小堯舜而傳聞於宋如此可見鄰國訛傳之不可信此開禧輕率用兵所以致敗也

十三年<sub>丙午</sub>

先生年六十二差知嚴州府赴行在入見

天封寺記云子以謝定教人奏

行在是國除授後始入都

有延和殿退朝口號

自註庭奏姓名上日東廊出御坐

七月三日

到嚴州任

十四年<sub>丁未</sub>

高宗崩

先生年六十三在嚴州是歲始刻詩

見十虞跋語

十五年

戊申

先生年六十四在嚴州四月以任將滿奏乞仍就玉

局祠祿未報七月十日歸家

暑集

尋除軍器少監入都

本傳有宿監中作及致齋監中詩

十六年

己酉

孝宗傳位於光宗

金世宗崩章宗卽位

先生年六十五遷禮部郎中兼實錄院檢討官按本傳以此官繫於紹熙元年然先生詩集是年有儀曹直廬南省宿直及史院書事詩十一月作明州阿育王碑記繫銜已書朝議大夫尚書禮部郎中兼實錄院檢討官則淳熙末已爲是官其冬以口語被斥歸

作風月軒自記十年間兩坐罷斥皆以詩謂之嘲詠  
風月故以名其軒

光宗紹熙元年

庚戌

先生年六十六以後皆家居是年又刪訂詩稿自跋  
云此予丙戌以前詩十之一也在嚴州再編又去十  
之九然則丙戌以前詩存者百之一耳又子虞跋云  
戊申己酉以後詩公自大蓬謝事歸命子虞編爲四  
十卷親加校定後復題其籤曰劍南詩續稿

子虞跋云  
公君在新

定所編前稿於舊詩多所去取其所遺詩存者尚有七  
卷前稿行已久不敢復雜之卷中故別其名曰遺稿云

又云自此以後

至捐館通前爲八十五卷是歲先生自號九曲老樵

見跋鄭俠謝

昌國書後

二年辛亥

先生年六十七作建寧府尊勝院記及紹興府修學

記繫銜書中奉大夫提舉建寧府武夷山冲祐觀集

三年壬子

先生年六十八作天封寺記繫銜提舉冲祐之下增

山陰縣開國男食邑三百戶九月上書乞再任冲祐

十一月得請有拜敕口號自註祠祿錢帛粟絮共歲計下緒有奇予以前視大卿故俸給皆增於舊又云

往時使閩者例得茶三斤予未嘗沾及也又夜賦一首窮賴三升酒自註郡中月給酒九斗日恰得三升又寄張季長書近歲裁損濫恩所謂十色錦者所有

無幾觀此可見宋時祠祿之厚矣

四年癸丑

五年甲寅孝宗崩光宗病不能執喪皇子嘉王擴即位

是爲寧宗

先生年七十取舍東地一畝種花數十株名曰小園  
被命再領冲祐有詩又有孝宗皇帝挽詩

寧宗慶元元年

乙卯

二年

丙辰

先生年七十二又拜再領祠官之命有詩云悞恩四  
領幔亭秋九月作呂居仁集序繫銜書中大夫提舉  
冲祐觀蓋中奉大夫進中大夫

張季賢書來以大蓬見稱以  
子崇祿官視昔秘書監也

三年

丁巳

先生年七十三夫人王氏歿年七十一有子子虞烏  
程承子龍武康尉餘子懷子坦子布子聿孫元敏元

禮元簡元用元雅曾孫阿喜

按說郭記先生初娶某氏情好甚篤以不得於姑山去後過於沈氏

則始不勝情作詩有云傷心橋下春波綠猶見驚鴻照影來後年老再過沈園猶有此身行作稽山土猶望遺踪一悵然之句今夫人王氏則前妻出後所再娶也

是年有謝朱元晦寄紙被詩

四年

戊午

先生年七十四祠祿滿不敢復請是年有詩聞金虜亂淮以北皆望王師之至是時金北方多警傳聞於宋開禧用兵之謀所由起也

五年

己未

先生年七十五乞致仕有五月七日拜致仕敕口號又述懷詩四叨優老祿十送故鄉春按致仕後尚有半俸之給先生詩坐糜半俸猶多愧月費公朝二萬



錢以後繫銜但書中大夫致仕山陰縣開國男食邑三百戶而無提舉冲祐之利緣已罷祠祿也是歲朱子卒先生有祭文甚哀

六年

庚申

光宗崩

先生年七十六作居室記云舊食祠祿秩滿不敢請又二年遂請老法當得祠祿亦不敢言尋賜龜紫有詩紀恩作趙秘閣文集序繫銜書中大夫直華文閣致仕賜紫金魚袋

嘉泰元年

辛酉

先生年七十七子布自蜀中歸

二年

壬戌

先生年七十八有食不足詩自註卿監致仕當得分  
司祿然須自請今置之頃有赦令賜致仕者粟帛羊  
酒郡中亦格不行會孝宗光宗兩朝實錄及三朝史  
未就詔起先生同修國史實錄院同修撰免奉朝請  
本入都開局皆有詩尋又兼秘書監自言三作史官  
皆新開局也作婺州稽古閣記繫銜書中大夫直華  
文閣提舉佑神觀蓋起用後又昇祠祿有自嘲詩予仕宦幾五十  
年歷崇道玉局冲祐今又忝佑神之命以修國史兼  
秘書監居六官宅又有詩枉辱三華組自註國史實  
錄及策府也是歲子虞赴金壇丞子龍赴吉州掾有  
詩寄二子云大兒新作鶴林遊仲子經年戍吉州

三年

癸亥

先生年七十九四月修史成進御

是夕宿道山堂之東直舍

陞寶謨閣

待制

有辭寶謨閣

卽上章致仕不允又上章固辭乃授太

中大夫仍前寶謨閣待制提舉江州太平興國宮遂

以五月初東歸

吳

受外祠敕有詩自記云壬戌六月

十四日入都癸亥五月十四日去國中間有閏月蓋

相距正一年矣已致仕奉都省劄子致仕官得薦舉

乃舉臨安縣鞏豐隨州教授王田監南岳廟趙蕃按

致仕後謝丞相啟云致仕許歸已荷乾坤之造異恩

及幼更霑雨露之私蓋致仕恩例又蔭一子也

四年

甲子

韓侂冑定議伐金

先生年八十以後皆家居有閩虜亂送辛幼安入都等詩是歲送子虞官吳門送子坦官鹽官市征送子修官於閩皆有詩子通亦將赴官以兄弟皆出遂輟行周彥文遣畫工來寫先生像先生自作贊

開禧元年

乙丑

先生年八十一闕舍東隙地插竹爲籬名曰東籬自作記時方用兵而先生年已老故有詩云不須強預國家憂亦莫妄陳帷幄籌昔如埋劍常思出今作閒雲不計程然尚有出塞四首望王師之克捷也是歲子龍自江西歸

二年

丙寅

吳曦反以蜀地降金郭倪復泗川又攻宿州

唐州皆敗歸金人入寇

先生年八十二有詩云五處睽離父子情自註子虞  
調官行在子龍阻風西陵子修在閩子坦在海昌子  
與子布子通家居又有力耕詩云殘俸月無三萬錢  
自註子通編子詩四十八卷卷有百篇蓋卽劔南詩  
四十卷後之四十五卷也時已四十八卷且開禧二  
年以後尚有三年又每卷有百篇而今併爲四十五  
卷每卷皆不及百篇蓋子虞編刻時又有刪併耳是  
歲方用兵故先生有開西師復華州及觀邸報詩上  
蔡臨淮奏捷頻等句

三年丁卯

安丙誅吳曦復所獻金地史彌遠誅韓侂胄

先生年八十三恩封渭南伯食邑八百戶子虞調官  
淮西子龍官東陽丞子坦調彭澤丞是年作李虞部  
詩集序繫銜書太中大夫寶謨閣待制致仕渭南縣  
開國伯食邑八百戶賜紫金魚袋陳伯子遣畫工來  
寫先生像先生自作贊

嘉定元年

戊辰

和議成

先生年八十四有詩傳家六兒子其四今皓首自註  
大兒新年六十二仲子六十季亦近六十是年二月  
以後半俸亦不復請

二年

己巳

先生年八十五終於家是年有自笑一首自註臘月

五日湯沐按摩幾半日是早第一牙脫去此後尚有詩七首則先生之卒在臘底也然不詳何日

甌北詩話卷八

陽湖 趙翼 雲松

元遺山詩

元遺山才不甚大書卷亦不甚多較之蘇陸自有大小之別然正惟才不大書不多而專以精思銳筆清鍊而出故其廉悍沉摯處較勝於蘇陸蓋生長雲朔其天稟本多豪健英傑之氣又值金源亡國以宗社邱墟之感發爲慷慨悲歌有不求而自工者此固地爲之也時爲之也同時李冶稱其律切精深有豪放邁往之氣樂府則清雄頓挫用俗爲雅變故作新得前輩不傳之妙郝經亦稱其歌謠跌宕幽并之氣高視一世以五言雅



爲工出奇於長句雜言掄揚新聲以寫怨思金史本傳亦謂其奇崛而絕雕刻巧縛而謝綺麗是數說者皆可得其真矣

蘇陸古體詩行墨間尚多排偶一則以肆其辨博一則以侈其藻繪固才人之能事也遺山則專以單行絕無偶句構思皆渺十步九折愈折而意愈深味愈雋雖蘇陸亦不及也七言律則更沉摯悲涼自成聲調唐以來律詩之可歌可泣者少陵十數聯外絕無嗣響遺山則往往有之如車駕遁入歸德之白骨又多兵死鬼青山原有地行仙蛟龍豈是池中物蟻蝨空悲地上臣山京之只知壩上真兒戲誰識神州竟陸沉送徐威卿之蕩

蕩青天非向日蕭蕭春色是他鄉鎮州之只知終老歸  
唐土忽漫相看是楚囚日月盡隨天北轉古今誰見海  
西流還冠氏之千里關河高骨馬四更風雪短檠燈座  
主閑閑公諱日之贈官不暇如平日草詔空傳似奉天  
此等感時觸事聲淚俱下千載後猶使讀者低徊不能  
置蓋事關家國尤易感人惜此等傑作集中亦不多見  
耳

郝經作遺山墓誌謂其詩共五千五百餘篇爲古樂府  
以寫新意者又百餘篇以今題爲樂府者又數十百篇  
是遺山詩共五千七百餘篇乃世罕有其全集今所存  
者惟康熙中無錫華希閔刻本魏學誠作序謂其購得

善本而錄之卷首載元初徐世隆李冶二序於元世祖  
仍擡起頂格是必彷彿元初初刻本然詩僅一千三百四  
十首則所存者祇五分之一而已豈元初嚴忠傑等初  
刻時卽爲刪節耶抑華氏翻刻時刪去耶竊意遺山詩  
既有五千六七百首則其遭遇國變感慨滄桑必更有  
許多傑作而今祇有此數豈不可惜哉又遺山修飾詞  
句本非所長而專以用意爲主意之所在上者可以驚  
心動魄次亦沁人心脾今華氏刻本內第十三卷率  
多題畫絕句別無佳思而郝經所謂五千餘首者竟不  
得睹其全矣不知世間尚有全集否當更求之  
拘體七律如鄭縣亭子澗之濱獨立縹緲之飛樓之類

杜少陵集最多乃專用古體不諧平仄申唐以後則李  
商隱趙嘏輩創爲一種以第三第五字平仄互易如溪  
雲初起日沉閣山雨欲來風滿樓殘星幾點雁橫塞長  
笛一聲人倚樓之類別有擊撞波折之致至元遺山又  
創一種拘在第五六字如來時珥筆誇健訟去日攀車  
餘淚痕太行秀發斜字見老阮來樽俎間雞豚鄉社  
相勞苦花木禪房時往還肺腸未潰猶可活灰土已寒  
寧復燃市聲浩浩如欲沸世路悠悠殊未涯冷猿挂夢  
山月暝老雁叫羣江清深春波淡淡沙鳥沒野色荒荒  
烟樹平青山兩岸多古木平地數峯如畫屏長虹夜飲  
海欲竭老雁叫羣秋更哀東門太傅多祖道北闕詩人

休上書之類集中不可枚舉然後人習用者少

遺山複句最多如懷州城晚望少室云十年舊隱拋何處一片傷心畫不成重九後一日作云重陽擬作登高賦一片傷心畫不成題家山歸夢圖云卷中正有家山在一片傷心畫不成雪香亭雜咏十五首內有云賦家正有燕城筆一段傷心畫不成元都觀桃花云人世難逢開口笑老夫聊發少年狂同嚴公子東園賞梅云佳節屢從愁裏過老夫聊發少年狂此口不足惜篇就令一朝便得八州督爭似高吟大醉窮朝晡送李叅軍詩內又有云就令一朝便得八州督爭似綵衣起舞春班欄桐州與仁卿飲一聯風流豈落正始後詩卷長留天

地間題梁都運所得故家無盡藏詩卷亦有此聯田不  
伐望月婆羅門引云兩都秋色皆喬木三月阿房已焦  
土存沒一首又云兩都秋色皆喬木一代名家不數人  
答樂舜之云兩都喬木皆秋色耆舊風流有幾人東山  
四首有天公老筆無今古枉著千金買范寬胡壽之待  
月軒詩又有天公老筆無今古枉卻坡詩說右丞錢過  
庭烟溪獨釣圖綠簑衣底元真子不解吟詩亦可人息  
軒秋江捕魚圖又有綠簑衣底元真子可是詩翁畫不  
成臺山十詠內有云惡惡不可惡惡可未要雲門望太  
平贈劉君用可菴二首內一首云惡惡不可惡惡可笑  
殺田家老瓦盆次首云惡惡不可惡惡可大步寬行老

死休寄希顏末句共舉一杯持兩螯送曹壽之平水亦  
用此句作結此複句之最多者也

已見陔餘叢考

遺山在汴梁圍城中自天興二年春崔立以城降蒙古

後四月二十九日始得出京而二十二日已先有書上

蒙古相邪律楚材自稱門下士

詩文俱有月日可攷

此不可解時楚

材爲蒙古中書令遺山在金由縣令累遷郎曹平日料

無一面而遽干以書已不免未同而言卽楚材慕其名

素有聲氣之雅然遺山仕金正當危亂尤不當先有境

外之交此二者皆名節所關有不能爲之諱者豈蒙古

曾指名取索如趙秉文之類耶抑汴城之降在正月至

四月則已百餘日此百餘日中楚材早慕其名先寄聲

物色因有感恩知己之說耶

又接趙材主書主命於汴水與其弟思忠等遺山書節是時與趙材聚故也

遺山以崔立功德碑一事大不理於衆曰金哀宗天興元年冬帝自汴京出謀復河北畱完顏奴申完顏習捏阿不等總諸軍守京師及帝攻衛州敗奔歸德汴城中食盡羣議欲奉帝庶長兄荆王監國以汴降蒙古庶救一城之命或以告二相二相未敢專決西面元帥崔立遂因民之怨殺二相於尚書省劫荆王以汴京降其時立黨獻嬖者謂立此舉活百萬生靈應作碑以紀此功德碑之說所由起也按金史王若虛傳謂立黨翟奕以功德碑屬若虛若虛曰學士代王言此碑謂之代王言可乎奕不能奪乃召太學生爲之

此本遺山所作若虛墓誌金史據以爲傳

是若虛



與遺山均無與也若虛傳又云若虛辭免後召太學生

劉祁麻革到省元好問

山

時爲郎中謂祁等曰衆議屬

二君其毋辭祁不得已爲草定以示好問好問意未愜

乃自爲之然止直敘其事而已據此則碑文係祁先作

好問改作然郝經有辨磨甘露碑詩云國賊反城自爲

功萬段不足仍推崇勒文頌德召學士淳南先生付一

死

碑

林希更不顧名節兄爲起草弟親刻省前便磨甘

露碑書丹卽用丞相血百年涵養一塗地父老來看暗

流涕數尊黃封幾斛米賣御家聲都不計盜據中國責

金源吠堯極口無覩顏作詩爲告曹聽翁且莫獨罪元

遺山是已辨明碑文非遺山所作其作者姓名雖未而

斥而托之於林希兄弟

希本北宋人爲章惇所引肆詆正人者郝詩借以引自生碑文者耳

然既有

作文之人則非遺山可知但若虛傳謂遺山改作止直敘其事而郝詩中仍有盜據中原等語豈遺山所作不曾用而仍用太學生所作耶郝詩所云林希兄弟是此碑必有兄弟二人共爲之者遺山外家上梁文備述此事有云蜀家降欵具存李昊之世修趙王禪文何與陸機之手迹伊誰受賞於我嫁名是當時作文者已受賞而後反嫁名於遺山又云追韓之騎甫還射羿之弓隨穀自注云予北渡後獻書中令君薦諸名士而造謗者卽書中所薦之人也考遺山上邪律楚材書薦士凡五十四人其中有兄弟二人並列者惟渾源劉祁及其弟

郁則郝詩所云林希兄弟必指郝郁而言而郝作歸潛

志又力辨非已作而委之遺山

歸潛志謂禮部召余及麻信之入省首領官張信之元裕之以碑文

寫屬余等館不獲命乃歸草定付裕之越數日又召至省鎖門裕之謂碑文今日當畢事於是裕之屬草既成王從之及余爲定數字銘詞則從之裕之及存余舊志字碑字則全裕之筆也下又云其文皆衆筆非余全文彼欲嫁名於余余安得志在數日首領官奉立命齋告身三通付余輩特賜進士出身云云觀此可見崔志本郝起草好問改定又被此

想見當時其以此碑爲諸附逆

賊故各諱言耳然遺山於此事終有干涉其上梁文先

敘園中食盡待斃之狀云窮甚析骸死惟束手人望荆

兄之通好義均紀季之附庸謀則僉同議當就抗爰自

上書宰相所謂試微軀於萬仞不測之淵至於喋血京

師亦嘗保百族於羣盜垂涎之日是請荆王監國以汴

城降既係遺山先上書執政

金史叙中傳并載遺山語甚詳

及崔立肆逆又

嘗保護多人免於凶害則其於立情分素熟可知也卽王若虛傳所云召劉祁麻革至省遺山以衆議咸屬二君爲囑是遺山已爲之關說原不必論碑文之作與否矣

遺山仕於金官至尚書省左司員外郎

郝經墓誌謂入翰林知制誥兼官也

國變後以詩文重名爲海內魯靈光者幾三十年客東平嚴實幕下最久以國亡史作已所當任聞累朝實錄在順天張萬戶家乃往請於張願以身任編纂之責爲樂藝所阻而止於是構野史亭於家凡金君臣事蹟採訪不遺至百餘萬言所著壬辰雜編等書爲後來修金史者張本其心可謂忠且勤矣雖崔立功德碑一事不

免爲人訾議然始終不仕蒙古

時尚未建國號故但稱蒙古

則確有明據

故郝經所撰墓誌及金史本傳皆云金亾不仕是可謂完節矣乃李冶徐世隆二序俱以其早死不得見用於元世祖爲可惜此真無識之論也設使遺山後死數年見用於中統至元中亦不過入翰林知制誥號稱內相而已豈若金亡不仕四字垂之史冊哉余嘗題其集云無官未害餐周粟有史深愁失楚弓頗道著遺山心事矣

高青邱詩

詩至南宋末年纖薄已極故元明兩代詩人又轉而學唐此亦風氣循環往復自然之勢也元末明初楊鐵崖

最爲巨擘然險怪仿昌谷妖麗仿溫李以之自成一家  
則可究非康莊大道當時王常宗已以文妖目之未可  
爲後生取法也惟高青邱才氣超邁音節響亮宗派唐  
人而自出新意一涉筆卽有博大昌明氣象亦闢有明  
一代文運論者推爲開國詩人第一信不虛也李志光  
作高太史傳謂其詩上窺建安下逮開元至大厯以後  
則藐之此亦非確論今平心閱之五古五律則脫胎於  
漢魏六朝及初盛唐七古七律則參以中唐七絕并及  
晚唐要其英爽絕人故學唐而不爲唐所囿後來學唐  
者李何輩襲其面貌仿其聲調而神理索然則優孟衣  
冠矣鍾譚等又從一字一句標舉冷僻以爲得味外味

則幽獨君之鬼語矣獨青邱如天半朱霞映照下界至今猶光景常新則其天分不可及也

李青蓮詩從未有能學之者惟青邱與之相上下不惟形似而且神似青蓮樂府及五古多主敘事不著議論蓋用古人意在言外之法此古詩正體也青邱樂府及擬古十二首萬感二十首秋懷十首咏隱逸十六首亦只敘題面不復於題面內推究意義發揮議論如咏向長則但說長之畢婚嫁遊名山咏周黨則但說黨之辭徵聘樂田里而一種邁往高逸之致自見於楮墨之外此正是學青蓮處七古內如將進酒將軍行贈金華隱者題天池石壁圖登陽山絕頂春初來憶昨行等作置

之青蓮集中雖明眼者亦難別擇昔司馬子微謂青蓮有仙風道骨而青邱贈陶篷先生亦云謂予有仙契泥滓非久淪蓋二人實皆有出塵之才故相契在神識間耳然青邱非專學青蓮者如游龍門及答衍師見贈等作骨堅力勁則竟學杜太湖及天平山游城西贈楊榮陽寄王孝廉乞猶等作長篇強韻層出不窮無一懈筆則又學韓送徐七往蜀山書舍古體帶律奇峭生硬更與昌黎之答張徹如出一手集中本有效樂天體一首又聽教坊舊妓弟子陳氏歌一首亦神似長慶中秋玩月張校理宅又似李義山玉波冷雙蓮及鳳臺曲神絃曲秦箏曲待月詞春夜詞黑河秋雨引又似溫飛卿蔡



經宅及書夢贈徐高士送李外史等作又皆似黃庭經  
可見其挫籠萬有學無常師也卽如身當元季沉淪江  
村身未歷殿陛目未觀典章一旦召修元史列於朝班  
其詩卽典切瑰麗雖賈至岑參等早朝大明宮之作不  
能遠過此非其天才卓絕過目卽脗契而能若是乎惜  
乎年僅三十九遽遭摧殞遂未能縱橫變化自成一大家  
然有明一代詩人終莫有能及之者今姑摘其七律  
數首於後觀者可識其才力矣

重臣分陝出朝端  
寶從威儀盡漢官  
四塞河山歸版  
籍百年父老見衣冠  
流關月落聽雞度  
華岳雲開立馬看  
知爾西行定回首  
如今江左是長安

送沈左司從汪  
奉政分省陝西

城苑秋風蔓草深豪華都向此銷沉趙佗空有稱尊

意劉表初無弭亂心半夜危樓俄縱火十年高鳥漫

藏金廢興一夢誰能問回首青山落日陰吳城感舊詩

書成一代存殷鑒朝列千官備漢儀奉天殿進元史白下有山

皆繞郭清明無客不思家清明日呈館中諸公遠客帆檣秋水外

殘兵鼓角夕陽中寄題安慶城樓賜履已分無棣遠舞戈還見

有苗來送鄭都司赴大將軍行營川儒幸際千年會造士欣為一縣

師送殷孝章赴咸陽教諭春回廢苑還芳草人渡空江正落潮送

軍諒遠不假五丁開道遠俄看萬甲積山齊開王師下蜀此等

詩氣調才力不減於唐而典麗細切更過之前後七

子所未夢見也

青邱子歌一首自言其作詩之憔悴專一有云朝吟忘  
其饑暮吟散不平頭髮不暇櫛家事不及營兒啼不知  
憐客至不果迎向水際獨坐林間獨行斲元氣搜元精  
冥茫八極遊心兵微如懸破繭壯若屠長鯨高攀天根  
探月窟犀照牛渚萬怪呈是其功力之精至可謂極矣  
然集中惟登西城門云并吞何時休百骨易寸土題畫  
鷹云秋筋束老骨天寒勢逾矯太湖云聲吹地將浮勢  
擊山欲壞此數句最爲警策其他亦少有驚心動魄者  
蓋其用力全在使事典切琢句渾成而神韻又極高朗  
此正是細膩風光看是平易實則洗鍊功深觀唐以來  
詩家有力厚而太過者有氣弱而不及者惟青邱適得

詩境中恰好地步固不必石破天驚以奇傑取勝也

青邱詩亦有複句如次韻西園公咏梅云春後春前曾  
獨採江南江北每相思而和衍師咏梅第三首亦有此  
二句但改採爲採耳次韻陳畱公見貽湖上之作有云  
葉應隨鳥散山欲趁波流而月夜遊太湖排律內亦有  
此二句晚尋呂山人有云君家最可認隔樹有書聲而  
題畫贈內弟周思恭亦云君家還可認爲有讀書聲送  
思上人云野飯晨畱鉢城鐘夜到船而送衍師亦云  
村中乞米晨畱鉢城外聞鐘夜到船但變五言爲七言  
耳咏樵有云伐木驚禽起穿雲畏虎過又一首咏樵云  
穿雲衝過虎伐樹起棲禽皆未免重複

已見咳  
餘叢考

至如咏梅

九首內以雪滿山中高士臥月明林下美人來爲佳句而第五首翠袖佳人依竹下白衣宰相住山中此則雖不複詞而窠臼仍複

青邱詩有吹臺集缶鳴集江館集鳳臺集雙江吟稿姑蘇雜咏等編洪武中未敢梓行景泰時有徐庸字用理者彙而刻之共一千七百七十餘首名之曰大全集青邱詩之在世者惟此本最爲完備然編次尚多錯互旣分體爲卷自不專在編年然分體中亦須隨其年之先後闕者始了然今則中年之作或雜於少時元季之作又入於明初使人悶悶如送張進士會試有云邇來國運屬中圯爭慕死節羞生全潯陽老守鬢汗赤山東大

帥竟沉淵蓋指李黼董搏霄等殉難之事則元季詩也而皆編在始歸江上夜聞吳生歌之後中有云解紱今年別紫宸歸舟江上又逢君則青邱已應召修史擢戶部侍郎辭歸矣其後又有送張員外從軍越中之作有云明朝若上越王臺應有中原陸沉嘆又有送王稹赴大都路等詩則又是元季所作如此類者不一而足前後倒置不勝披尋至如五排及七律皆以明初在朝之作冠於首而先後里居客居詩在後此固明人習氣好以承明著作壓卷以爲冠冕然五七古則又以里居客居詩編在前五律又以在朝之作編在中間而里居客居詩分列前後七絕又將車駕享太廟還宮等作編在

卷後體例皆不畫一明人刻書不加考訂往往如此

青邱之死據堯山堂外紀謂其有題宮女圖云小犬隔

花空吠影夜深宮禁有誰來明祖聞而銜之故及於禍

李志光所作傳則謂啟謝事歸里適魏觀守蘇甚禮遇

啟不得已爲其上客遂連蹇以死

傳作于洪武乙卯故并不言彼誅

則青

邱似專爲魏觀所累惟明史本傳謂啟嘗賦詩有所諷

刺帝嫌之未發歸家以觀改修郡治啟爲作上梁文帝

怒遂腰斬於市是青邱先以詩召嫌而禍發於觀之上

梁文也按青邱又有題畫犬一首云莫向瑤階吠人影

羊車半夜出深宮則更不止隔花吠影之句矣獨是張

士誠有浙右時羣彥多受其官青邱獨屏居吳淞江上

其不仕於僭偽已有卓識及洪武初召修元史史成令授諸王經旋擢戶部侍郎青邱畏禍力辭而歸可謂明哲保身矣乃又以詩文召禍何其不自檢耶

按上梁文不可見而集中尚有

郡治上梁詩一首云郡治新遷傳觀雄文梁高舉跨瞻空南山久養千尋器東海初生貫日虹欲與龍庭宜化遠還開燕寢賦詩工大材今作費堂用民庶多歸廣

志光所作傳謂啟與饒介爲詩文交最相契他定交者又有王彛楊基杜寅張憲張羽周砥王行宋克徐賁皆不羈才云明史王行傳載北郭十才子則高啟王行徐賁高遜志唐肅宋克余堯臣張羽呂敏陳則今按青邱懷十友詩則張羽楊基王行宋克徐賁王彛余堯臣陳則呂敏及僧道衍而與賁贈答尤多五古有同徐山人



賁過妙蓮佛舍一首懷徐七一首雨中畱徐七一首送  
徐七往蜀山書舍一首次徐山人與倪雲林贈答詩韻  
一首七律內有期徐七遊靈巖一首答徐記室病中作  
一首徐記室北歸見訪南渚一首七絕內有和徐七聞  
鄰家酒槽聲一首寒夜逢徐七一首讀徐七北郭集一  
首徐記室謫鍾離歸同登東邱一首徐記室客京師余  
至京而記室已歸一首此可見二人踪跡之密也此外  
則道衍亦最厚五古內有答道衍見贈一首七古內有  
和衍上人觀梅一首五律內有賦得履送衍上人一首  
七律內有衍師見訪鍾山里第一首送衍師還相川一  
首咏梅次衍師韻一首是時道衍方以詩與諸才士角

逐名場固未知後來爲佐命功臣也

甌北詩話卷九

陽湖 趙翼 雲松

吳梅村詩

高青邱後有明一代竟無詩人李西涯雖雅馴清淑而  
才力尚小前後七子當時風行海內迄今優孟衣冠笑  
齒已冷通計明代詩至末造而精華始發越陳臥子沉  
雄瑰麗實未易才意理粗疎處尚未免英雄欺人惟錢  
吳二老爲海內所推入國朝稱兩大家顧謙益已仕  
我朝又自托於前朝遺老借陵谷滄桑之感以拚其  
一身兩姓之慙其人已無足觀詩亦奉禁固不必論  
也梅村當國亡時已退閒林下其仕於我朝也因薦

而起既不同於降表僉名而自恨濡忍不死跼天踏地之意沒身不忘則心與跡尚皆可諒雖當時各位聲望稍次於錢而今日平心而論梅村詩有不可及者二一則神韻悉本唐人不落宋以後腔調而指事類情又宛轉如意非如學唐者之徒襲其貌也一則庀材多用正史不取小說家故實而選聲作色又華豔動人非如食古者之物而不化也蓋其生平於宋以後詩本未寓目全濡染於唐人而已之才情書卷又自能瀾翻不窮故以唐人格調寫目前近事宗派既正詞藻又豐不得不推爲近代中之大家若論其氣稍衰颯不如青邱之健舉語多疵累不如青邱之清雋而感愴時事俯仰身世

纏綿悽惋情餘於文則較青邱覺意味深厚也

梅村身閱鼎革其所詠多有關於時事之大者如臨江  
叅軍南廂園叟永和宮詞雒陽行殿上行蕭史青門曲  
松山哀雁門尚書行臨淮老妓行楚雨生行圓圓曲思  
陵長公主挽詞等作皆極有關係事本易傳則詩亦易  
傳梅村一眼覷定遂用全力結撰此數十篇爲不朽計  
此詩人慧眼善於取題處白香山長恨歌元微之連昌  
宮詞韓昌黎元和聖德詩同此意也

王阮亭選梅村詩共十二首陳其年選十七首此特就  
一時意見所及尚非定評梅村之詩最工者莫如臨江  
叅軍松山哀圓圓曲茸城行諸篇題旣鄭重詩亦沉鬱

蒼涼實屬可傳之作其他閒情別趣如松鼠石公山縹緲峯王郎曲摹寫生動幾於色飛眉舞直溪吏臨頓兒蘆洲馬草捉船等又可與少陵兵車行石壕吏花卿等相表裏特少遜其道鍊耳

梅村古詩勝於律詩而古詩擅長處尤妙在轉韻一轉韻則通首筋脈倍覺靈活如永和宮詞方敘田妃薨逝忽云頭白宮娥暗顰蹙庸知朝露非爲福宮草明年戰血腥當時莫向西陵哭又如王郎曲方敘其少時在徐氏園中作歌伶忽云十年芳草長洲綠主人池館空喬木王郎三十長安城老大傷心故園曲雁門尚書行已敘其全家殉難有幼子瀕死其兄來秦攜歸忽云回首

潼關廢壘高知公於此墜蓬蒿益覺迴顧蒼茫此等處  
關楨一轉別有往復迴環之妙其秘訣實從長慶集得  
來而筆情深至自能俯仰生姿又天分也惟用韻太泛  
濫往往上下平通押如遇劉雪舫則真文元庚青蒸侵  
通押游石公山則支微齊魚通押他類此者甚多未免  
太不檢矣按洪武正韻有東無冬有陽無江於唐韻多  
所併省豈梅村有意遵用以存不忘先朝之意耶

七律不用虛字全用實字唐時賈至等早朝大明宮諸  
作已開其端少陵五更鼓角三峽星河錦江春色玉壘  
浮雲數聯杜樊川深秋簾幕千家雨落日樓臺一笛風  
趙渭南殘星幾點雁橫塞長笛一聲人倚樓陸放翁樓

船夜雪瓜洲渡鐵馬秋風大散關皆是也然不過寫景  
梅村則并以之敘事而詞句外自有餘味此則獨擅長  
處如贈袁韞玉云西州士女章臺柳南國江山玉樹花  
十四字中無限感慨固爲絕作他如揚州感事云將軍  
甲第藥弓臥丞相中原拜表行弔衛紫岫殉難云埋骨  
九原江上月思家百口隴頭雲寄遼左故人云樂浪有  
吏崔亭伯遼海無家管幼安桑麻亭障行人斷松杏山  
河戰骨空贈淮撫沈清遠云去國丁年遼海月還家甲  
第浙江潮雜感云金城將吏耕黃犢玉壘山川祭碧雞  
雞豚絕壁人烟少珠玉空江鬼哭高贈陳定生云茶有  
一經真處士橘無千緡舊清卿送永城吳令云山縣尹



來二月雨人家兵後十年耕送安慶朱司李云百里殘  
黎半商賈十年同榜盡公卿送李書雲典試蜀中云兵  
火才人羈旅合山川奇字亂離搜送顧荷來典試粵東  
云使者干旌開五管諸生禮樂化三苗送曹秋岳謫粵  
東云海外文章龍變化日南風俗鳥輶輶寄房師周栢  
公云廣武登臨狂阮籍承明寂寞老楊雄此數十聯皆  
不著議論而意在言外令人低徊不盡其他如宴孫孝  
若山樓云明月笙歌紅燭院春風書畫綠楊船西冷閨  
咏云紫府蕭閒詩博士青山遺逸女尚書無題云千絲  
碧藕玲瓏腕一卷芭蕉宛轉心投督府馬公云江山傳  
箭旌旗色賓客圍棋劍履聲長安雜咏云奉轡射生新

宿衛帶刀行炙舊名王滇池鐃吹云朱鳶縣小輪寶布  
白象營高掛柘弓魚龍異樂軍中舞風月蠻姬馬上簫  
送曹秋岳官廣東左轄云五管清秋開使節百蠻風靜  
據胡牀送林衡者歸闔云征途鵬鵠聲中雨故國桄榔  
夢裏天送隴右道吳贊皇云城高赤坂魚鹽塞日落黃  
河鳥鼠秋送友人出牧云壯士驪山秋送戍豪家渭曲  
夜探丸送楊猶龍按察山西云紫貂被酒雲中火鐵笛  
迎秋塞上歌送朱遂初憲副固原云荒祠黑水龍湫暗  
絕坂丹崖鳥道盤聞台州警云雁積稻梁池萬頃猿知  
擊刺劒千年此數十聯雖無言外意味而雄麗華瞻自  
是佳句送馮子淵總戎云十二銀箏歌芍藥三千練甲

醉葡萄俠少云柳市博徒珠勒馬柏堂爭妓石華裙訪  
吳永調云南州師友江天笛北固知交午夜袖觀蜀鵲  
啼劇云親朋形影燈前月家國音書笛裏風雲間公讌  
云三江風月尊前醉一郡荆榛笛裡聲此則雜奏成句  
耳其病又在專用實字不用虛字故掉運不靈幹旋不  
轉徒覺堆垛益成呆笨如贈陳之遴謫戍遼左云曾募  
流移耕塞下豈遷豪傑實關中何嘗不典切生動耶  
過維揚弔少司馬衛紫岫一首自註韓城人余同官同  
年死揚難按此卽明史高傑傳中衛允文也福王時傑  
移駐徐州朝議以允文與傑同鄉命兼兵科給事中監  
其軍而不著其死揚州之難史可法傳歷載同時死事

者數十人亦無允文姓名按可法傳謂高傑死後允文承馬士英指疏謂可法則修史者或因其黨於士英故并其死事亦削而不書耶梅村與允文同時弔其殉難必非無據今正史不載獨賴梅村一詩得傳死節於後不可謂非允文之幸矣

陳濟生紀略牛金星以允文既創髮何又求報名希用令人接其餘毛則明史不立傳以其曾降賊也

梅村熟於兩漢三國及晉書南北史故所用皆典雅不比後人獵取禪官叢說以炫新奇者也如弔衛允文云非關衛瓘需開府欲下高昂在護軍正指其監護高傑軍而暗切兩人姓氏送杜陵武云非是雋君辭霍氏終然丁掾感曹公嚴武避難江南適梅村悼亡欲以女爲梅村繼室梅村辭之故用雋不疑辭霍光之婚及曹操

欲以女妻丁儀因曹丕言而止皆議婚不成故事也可  
謂典切矣然亦有與題不稱而強爲牽合者如永和宮  
詞詠田貴妃事有云聞道羣臣譽定陶獨將多病憐如  
意本謂田妃有子慈煥因寵特鍾愛故以趙王如意爲  
喻然定陶漢成帝從子入繼正統崇禎帝自有太子何  
必以定陶作襯且太子久定嫡庶間並無參商何必以  
如意爲比又云漢家伏后知同恨只少當年一貴人此  
言周后殉難時田妃已先死也然周后奉旨自盡何得  
以曹操之弑伏后爲比維陽行敘福王初封河南有云  
渭水東流別任城漢光武子尚魏武子彰皆封任城王  
皆濟寧州地與渭水何涉揚州詩荳蔻梢頭春十二菜

黃灣口路三千按杜牧詩娉娉嬈嬈十三餘  
荳蔻梢頭二月初無所謂春十二也雜感內取兵遼海哥舒翰得  
婦江南謝阿蠻本以降將哥舒翰比吳三桂然翰無取  
兵遼海之事以阿蠻比圓圓然阿蠻本新豐人非江南  
產貽袁鑑王之盧女門前烏柏樹昭君村畔木蘭舟盧  
女無烏柏樹故事昭君無木蘭舟故事但採掇字面鮮  
麗好看耳王阮亭詩景陽樓畔文君井明聖湖頭道韞家亦同此體蓋當時風氣如此竹垞初自則無此病矣集中如此  
類者不一而足梅村好用詞藻不免爲詞所累其自謂  
鑲金錯采不能到古人自然高妙之處正以此也又有  
用事錯悞者補稷駕湖云春風好景定昆池昆明池在  
長安唐安樂公主請之不得乃自開大池號定昆池此

與鴛湖何涉又戲贈一首有云何綏新作婦人裝按服  
婦人衣者何晏也見宋書五行志而晉書何綏乃何遵  
子初無婦人裝故事觀棋一首有云博進知難賭廣州  
宋書羊元保與文帝賭郡勝遂補宣城太守是宣川非  
廣州也咏鯀魚云自慚非食肉每飯望休兵食魚無休  
兵典故况鯀魚耶亦覺無謂此皆隨手闌入不加檢點  
之病

梅村出處之際固不無可議然其顧惜身名自慙自悔  
究是本心不昧以視夫身仕興朝彈冠相慶者固不同  
比之自諱失節反託於遺民故老者更不可同年語矣  
如赴召北行過淮安云我是淮王舊雞犬不隨仙去落

人間遣悶云故人往日燔妻子我因親在何敢死憔悴而今至於此欲往從之愧青史臨歿云故人慷慨多奇節爲當年沉吟不斷草間偷活脫屣妻孥非易事竟一錢不值何須說至今讀者猶爲悽愴傷懷余嘗題其集云國亡時已養親還同是全生跡較閒幸未名登降表內已甘身老著書閒訪才林下程文海作賦江南庾子山剩有沉吟偷活句令人想見淚痕潛似覺平允之論也

梅村當福王時有北來太子一事舉朝信以爲真左良玉因此起兵討馬士英朝臣無不稱快梅村亦同此心也故揚州詩內有東來處仲無他志之句謂良玉跡似



王敦而心非爲逆及良玉死其幸舍客蘇崑生來江南  
士大夫猶以良玉故而矜寵之梅村贈以詩云西興哀  
聞夜深聞絕似南朝汪水雲回首岳侯墳下路亂山何  
處墓將軍則并以岳忠武比良玉毋乃擬非其倫矣  
梅村詩從未有註近時黎城靳榮藩字介人以十年之  
功爲之箋釋幾於字櫛句梳無一字無來厯其於梅村  
同時在朝在野往還贈答之人亦無不考之史傳史傳  
所不載考之府縣志府縣志所不載採之叢編脞說及  
故老傳聞一一詳其履厯其心力可謂勤矣昔施元之  
註東坡詩任淵註山谷詩距蘇黃之歿僅五六十年已  
爲難事介人註梅村詩在一百餘年之後覺更難也且

梅村身閱興亡時事多所忌諱其作詩命題不敢顯言  
但撮數字爲題使閱者自得之如雜感雜咏卽事咏史  
東萊行雒陽行殿上行之類題中初不指明某人某事  
幾於無處捉摸介人則因詩以考史援史以証詩一一  
疏通證明使作者本指顯然呈露如臨江叅軍之爲揚  
廷麟叅盧象昇軍事也永和宮詞之爲田貴妃薨逝也  
雒陽行之爲福王被難也後東臯草堂歌之爲瞿式耜  
也鴛湖曲之爲吳昌時也葦城行之爲提督馬逢知也  
蕭史青門曲之爲寧德公主也川家鐵獅歌之爲閬城  
田宏遇也松山哀之爲洪承疇也殿上行之爲黃道周  
也臨淮老妓行之爲劉澤清故妓冬兒也拙政園山茶

及贈遼左故人之爲陳之遴也畫蘭曲之爲卞玉京妹  
卞敏也銀泉山之爲明神宗朝鄭貴妃也吾谷行之爲  
孫賜戍遼左也短歌行之爲王子彥也又律詩中有一  
題數首者亦各首註其所指如卽事十首內第四首列  
卿嚴譴赴三韓謂指陳之遴第八首無事漫提歐冶劍  
有心長放呂嘉船謂指耿精忠玩寇自恣第九首老臣  
褻革平生志往事傷心尚鐵衣謂指洪承疇先爲前朝  
經畧至 本朝又爲川湖雲貴經畧第十首全家故國  
空從難異姓真王獨拜恩謂指吳三桂以平西王率師  
在蜀又雜感內第四首亦指三桂第五首指瞿式耜他  
如鴛湖閨咏之爲黃皆令無題四首之爲卞敏亦皆確

切有據至如和友人走馬詩因第二首君是黃驄最少  
年驍騁凋喪使人憐當時指望勲名貴後世誰知書畫  
傳始悟其爲楊龍友而作龍友貴陽人雖昵於馬士英  
而素工書畫又因下半首云十載鹽車悲道路一朝天  
馬蹴風烟以証龍友先官江寧令爲御史詹兆恒劾罷  
至南渡時起兵擢至巡撫末句云軍書已報韓擒虎夜  
半新林早著鞭則乙酉五月龍友方率兵在京口與我  
軍相持而我軍已乘霧潛濟如韓擒虎之入新林陳人  
猶不知也此等體玩詩詞推見至隱非好學深思心知  
其意而能若是乎梅村詩一日不滅則靳註亦一日並  
傳無疑也

梅村詩本從香奩體入手故一涉兒女閨房之事輒于  
嬌百媚妖豔動人幸其節奏全仿唐人不至流爲詞曲  
然有意處則情文兼至姿態橫生無意處雖鏤金錯采  
終覺膩滯可厭惟國變後贈袁韞玉云西州士女章臺  
柳南國江山玉樹花及被薦赴召路過淮陰云我是淮  
王舊雞犬不隨仙去落人間此數語俯仰身世悲痛最  
深實足千載不朽

後東臯草堂歌蓋作於順治七年瞿式耜殉節桂林之  
後式耜以宏光乙酉赴廣西巡撫任其家在常熟有嚴  
柎等倡義守城各鄉兵已屯駐瞿園

卽東臯見海角遺編福山人所作不著氏名

是

時雖有搜捕逆紳之令幸洪承疇以大學士招撫江南

故與式耜丙辰同榜進士陰保護之

見式耜孫昌文勇行紀事

舉家得

無恙詩所謂可憐雙戟中丞家門貼淒涼題賣宅有子

單居持戶難棄擲城南尺五山者蓋是時式耜子嵩錫

懼家門遭禍不得不門貼賣宅爲韜晦避難計然未嘗

易主也若在順治七年以前則式耜方以大學士臨桂

伯璫守桂林西南半壁倚爲長城事之成敗尚未可知

梅村縱不敢望其捲土重來亦豈逆知其必敗而咏以

花木移於鄰家杉松植於僧舍極形容荒涼廢壞之狀

耶況此詩云我來草堂何處宿挑燈夜把長歌續是梅

村作詩時東臯尚爲瞿氏所有據昌文謂家徒壁立僅

存東臯百畝易銀質貨入粵爲迎喪資此已在順治九

年

昌文已奉其祖父母遺骸歸在途  
次而家中不知醫藥舉爲迎柩計

始行賣宅梅村詩當作於是

時也後查初白弔春暉堂詩

即

戰後河山非故國記中

花木尚平泉似康熙十八九年尚屬瞿氏名臣之世澤  
長矣

陳濟生再生紀畧程源孤臣紀哭徐夢得日星不晦錄

及紳志畧燕都日記

不著異  
人氏名

皆謂明崇禎十七年三月十

九日京城陷襄城伯李國禎見李自成要以三事一祖

宗陵寢不可毀一葬先帝以帝后之禮一太子諸王不

可害賊皆諾之及薨畢國禎卽自殺是皆謂其能殉節

者宏光中并有贈諡在正祀武臣七人之内然記載各

有不同或曰自縊或曰自殺或曰藥死或曰卽死於帝

后殞所或曰送至昌平藁葬訖死於陵旁獨王士德崇  
禎遺錄謂城陷後國禎欲突崇文門不得出奔朝陽門  
孫如龍已降賊將張能勸之降國禎遂降於能能羈  
之令輸金國禎願至家搜括以獻而家已爲他賊所據  
遂被擒拷掠折足以荆筐曳回是夜自縊死而宏光之  
有贈諡乃其門客輩訛傳到南都得倖邀卹典也是同  
一死也一則謂其殉節一則謂其拷賊將奚從惟梅村  
遇劉雪舫詩有云寧爲英國死不作襄城生而論乃定  
梅村赴名入都距國變時未久國禎之死尚在人耳目  
間固不敢輕爲誣衊也明史李濬傳後闖賊勒國禎降  
國禎解甲聽命責賄不足被拷折足自縊是蓋據梅村



詩爲証然則梅村亦可稱詩史矣

按英園勳黃輔裔孫世  
爲國後爲閩賊所殺

下相極樂菴讀同年北使時詩卷蘭若停驂灑墨成過  
江持節事分明上林飛鴈無還表頭白山僧話子卿所  
謂同年者不知何人新註謂左懋第與梅村辛未同年  
進士宏光乙酉以兵部侍郎使於我朝不屈而死故  
云飛鴈無還表而此其節於蘇武也

倣唐人本事詩錦袍珠絡翠兜鍪軍府居然王子侯自  
寫赫躡金字表起居長信閣門頭勝梧秋盡瘴雲黃銅  
鼓天邊歸旆長遠愧木蘭身手健替耶征戰去他鄉  
託謂爲定南王孔有德女四貞作按有德取桂林後卽  
鎮守粵西順治九年爲李定國所敗自焚死特恩賜

墓卹典極隆其子爲定國所擄四貞脫歸京師 朝廷

念其父功命照和碩格格食俸通籍宮禁

見八旗通志及瞿昌文粵行紀事

後嫁孫延齡爲撫蠻將軍仍鎮粵西延齡從吳三桂反四貞勸其反正并代爲乞降許之靳註謂此詩正詠四貞事軍府居然王子侯則有德爲藩王時其子女皆貴重爲王子王女也寫表起居謂通籍宮禁得自奏事也其後從逆及反正等事梅村已卒固不及知之其第四首新來夫壻奏兼官下直更衣禮數寬昨日校旗初下令笑君不敢舉頭看豈嫁延齡鎮粵時自恃驕貴與其夫同演武於教場耶

靳榮藩論梅村謂大家手筆興與理會若穿鑿附會或

牽合時事強題就我則作者之意反晦此眞通人之論也乃其註梅村詩則又有犯此病者梅村五古如讀史及雜詩四首咏古六首七古如行路難十八首皆家居無事讀書得閒所作豈必一一指切時事而榮藩謂讀史第一首刺阮大鍼其二刺薛國觀其四刺孫可望行路難之其三謂刺唐王其九謂刺張至發其十七謂刺福王而按之原詩無一切合者阮大鍼固魏闖餘黨然何至以曹操比之謂東漢壞於闖而操本闖人曹騰之後竟移漢祚又如咏公孫述遣刺客連殺來歙岑彭二大將而刺客之名不傳此與朝事何涉而謂其刺勳臣之不能爲國禦侮又如行路難第三首龍子作事非尋

常奪棗爭梨天下擾此本咏晉八王之亂而以爲咏明  
末唐王聿鍵試思聿鍵先以起兵勤王被劄鳳陽福王  
赦出後監國於閩中何曾有骨肉相爭之事雖同時魯  
王以海亦僭立於紹興然方與聿鍵相約固守未嘗相  
攻也惟聿鍵敗死後其弟聿鏞遁廣東自立與桂王逼  
處稍有相競然不逾時卽爲我軍所執亦無暇與桂王  
交兵何得以奪棗爭梨天下擾爲指此事耶至隆武時  
靖江王亨嘉反桂林爲丁魁楚陳邦傳擒獲則甫起事  
卽敗亦未有骨肉相爭之事皆難強爲附會也註中如  
此類者甚多此則過欲示其考覈之詳而不知轉失本  
指所謂必求其人以實之則鑿矣又如滇池鏐吹四首

乃順治十五年收雲南凱歌詩中方倭言勲伐而以第一首末句誰唱太平滇海曲桄榔花發去年紅謂預料吳三桂之將爲逆是時三桂方欲立功至十八年尚率兵入緬取永明王獻捷豈早有逆萌然其爲人狡譎陰悍則已人所共知伏讀

御批通鑑輯覽如見肺肝則謂梅村早見及此亦可

雜感第一首內聞說朝廷罷上都靳註謂順治八年裁宣府巡撫併入宣大總督然宣府豈上都耶按順治七年攝政王以京師暑熱欲另建京城於灤州派天下錢糧一千六百萬是年王薨

世祖章皇帝特詔免此加派其已輸官者准抵次年錢

糧所謂罷上都正指此事也靳註誤

避亂第六首曉起譁兵至戈船泊市橋草草十數人登岸沽村膠不知何將軍到此貪逍遙按此係順治二年太湖中明將黃蜚吳之葵魯游擊吳江縣吳日生好漢周阿添譚韋等糾合洞庭兩山同起鄉兵俱以白布纏腰爲號後入城圍巡撫吐國寶爲國寶所敗散去此事見海角遺編

福山人所著不著姓名

靳註亦不之及

長安雜咏內第二首燈傳初地中峯變經過流沙萬里來代有其人爲教出鳩摩天付不凡材靳註謂道忞潮陽林氏子棄弟子員出家爲天童密雲悟和尚法嗣順治己亥徵至京住齋宮萬壽殿 敕封宏覺國師按此

詩乃指西藏達賴喇嘛入覲之事達賴喇嘛相傳爲如  
來後身每煌槃後仍世世轉輪爲佛凡蒙古喀爾喀厄  
魯特無不尊之視前代之大寶法王不啻也順治中自  
西藏不遠萬里入覲故比之鳩摩羅什謂西域神僧也  
此豈道忞足以當之耶況上有經過流沙萬里來之句

耶靳註誤

忞公受封後回至江南與當事往還聲勢煥赫有月律  
禪師傳之曰伊胸中只有國師大和尚五字 見居易錄

讀史偶述第十二首松林路轉御河行寂寂空煩宿鳥  
驚七載金滕歸掌握百僚車馬會南城南城本明英宗  
北狩歸所居 本朝攝政王以爲府第朝事皆王總理  
故百僚每日會此順治七年王薨故云七載金滕也靳  
注意不之及

楊州第三首東來處仲無他志

新注謂以王敦比左良玉兵東下

北去深源

有盛名

謂以殷浩比高傑北討

按良玉兵東下以救太子討馬士英

爲名比之王敦頗切當殷浩素有盛名時人比之管葛  
豈高傑可比耶梅村蓋以深源比史可法首句云盡領  
通侯位上卿三分淮蔡各專征豈非可法以閣部開府  
揚州領高傑劉澤清劉良佐黃得功等四將各任專征  
之責而靳注以高傑當之殊誤

雜感第四首珠玉空江鬼哭高靳注謂潼川府中江縣  
有鄰江一名玉江又蓬溪縣有珠玉溪皆蜀中地不知  
此乃指張獻忠亂蜀時聚金銀寶玉測江水深處開支  
流以涸之於江底作大穴以金寶填其中仍放江流復



故道名之曰水藏所謂珠玉空江鬼哭高也

見明史流賊傳及  
懷麓堂藏書

又劫灰錄獻忠北去後一舟子詣副將楊展告之展令  
長槍探於江中遇木鞘則釘而出之數日高與城等展  
使人買米於黔楚諸省招集流移資其耕作由是一軍  
獨雄於川中展自稱錦江伯

七律紀事十首內第八首無事漫提歐冶劍有心長放  
呂嘉船斬又謂刺鄭芝龍按芝龍本海盜明崇禎初降  
明授遊擊唐王聿鍵僭號時倚爲柱石我 勦兵入閩  
芝龍卽棄主來降意欲卽令其鎮守八閩兼取廣東則  
其功當封拜而我 朝定閩後卽挾芝龍入京未嘗令  
其畱鎮則斬注所云刺芝龍者實屬無着自順治三年

博洛圖賴等擒斬唐王之後鄭彩等又出沒海上往往  
闖入爲崇總督則張存仁陳錦李率泰等巡撫則佟國  
璠等領兵官則陳泰棟阿賴耿繼茂哈哈木濟度伊爾  
德等各有戰功所謂放呂家船究未知屬誰順治十一  
年擾漳泉州總督李率泰畏葸無功以濟度代之則  
所謂放呂嘉船者蓋指率泰斬注謂刺鄭芝龍何耶又  
梅村送友人從軍入閩詩胡牀對客招猿寄羽扇麾軍  
逐呂嘉則姚啓聖等之收功矣

第十三首異物每邀天一笑自鳴鐘應自鳴琴按順治  
元年修政立法西洋人湯若望進渾天球一座地平日  
晷窺遠鏡各一具并輿地屏圖更請諸慰悉依西洋法

推算從之十五年又進相拒歷所謂自鳴鐘自鳴琴蓋  
卽是時所進創見以爲神技也斯注亦不之及

偶得第二首一自赤車收趙李探丸無復五陵豪按此  
乃順治九年

世祖拏獲京師大猾李應試潘文學二人正法之事應  
試混名黃鵬李三元本前明重犯漏網出獄專養強盜  
交結官司役使衙蠹盜賊競輸重賄舖戶亦出常例崇  
文門稅務自立規條擅抽課錢潘文學自充馬販潛通  
賊線挑聚壯馬接濟盜賊文武官多有與投刺會飲者  
住居外城多造房屋分照六部外來人有事某部卽投  
某部房內後拏獲時審訊惡跡審完我陳之遴皆默無

一語鄭親王詰之對曰李三巨惡誅之則已若不正法之過必被其害此二人豪猾之惡跡也斬注亦不之及

王匠亭池北偶談黃縣李正法後其黨某猶巨富造

屋落成宴客來嘉賓亦在坐有頭口牙手脚眼之對

番文學問驤馬牙行京師人謂驤馬曰頭口故有頭口牙之稱其  
黨某逢堂醢客其牆壁尚有頭口牙手脚眼之對